



basic education

Department:
Basic Education
REPUBLIC OF SOUTH AFRICA

SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS

SISWATI LULWIMI LWASEKHAYA (HL)

LIPHEPHA LEKUCALA (P1)

INKHWEKHWETI/INHLABA 2024

EMAMAKI: 70

SIKHATSI: Ema-awa la-2

Leliphepha linemakhasi la-14.

TICONDZISO KULABAHLOLWAKO

1. Leliphepha lehlukaniwe TIGABA LETINTSATFU:

SIGABA A:	Sivisiso	(30)
SIGABA B:	Sifinyeto	(10)
SIGABA C:	Takhi netimiso tekusetjentiswa kwelulwimi	(30)
2. Fundza TONKHE ticondziso ngekunakisisa.
3. Phendvula YONKHE imibuto ngeSiswati.
4. Cala LESO NALESO SIGABA ekhasini LELISHA.
5. Dweba umugca emva kwaleso naleso sigaba.
6. Tinombolo tetimphendvulo atihambisane naleto letisephepheni lemibuto njengobe tinjalo.
7. Shiya umugca emkhatsini wetimphendvulo takho.
8. Caphelisisa sipelingi/lupelomagama nendlela lowakha ngayo imisho.
9. Siphakamiso sekulawulwa kwesikhatsi:

SIGABA A:	Lokungenani emaminithi la-50.	
SIGABA B:	Lokungenani emaminithi la-30.	
SIGABA C:	Lokungenani emaminithi la-40.	
10. Bhala ngebunono nangesandla lesifundzekako.

SIGABA A: SIVISISO**UMBUTO 1**

1.1 Fundza lethekesthi bese uphendvula imibuto lelandzelako.

ITHEKSTHI A**KWESEKELANA**

- 1 Bukhosi Dlamini naTemave Mhlanga bahlangana ngemnyaka we-2015 emcimbini wekugubha ummemo endzaweni yaseManzana leyatiwa ngekutsi yi-Badplaas esigodzini saKamantjolo. Ngalesosikhatsi bahlangana, Temave abefundzela temtsetfo enyuvesi yasePitoli kantsi Bukhosi abenelibhizinisi lekubata tintfo atitsengise kulo lelidolobha. 5
Emuva kwemnyaka batana, **lutsandvo lwabo lwashisa tikhotsa**. Baba ngundzabamlonyeni. Uma kuphela umnyaka wesibili, bashada. Batsenga likhaya balungiselela kulivusa.
- 2 Letitsandzani tavakashela emtfolamphilo kuyewutfolela teluleko kubahlengikati. Kwentiwa lucwaningo lwelusito lwekucala. Babeluleka ngekutsi abaphutfume kadokotela. Uma befika badvonswa ingati bobabili. Babona kutsi kuncono bente luhlolo loluphelele lwemphilo. Emuva kwemalanga lamabili bahleti badla sidlo sakusihlwa, batfolela lucingo lolubuya kudokotela kutsi abafike esibhedlela batewulandza imiphumela yabo. Lokwafika engcondvweni yaBukhosi kutsi akanalo likhadi labodokotela lelibhadalwa njalo ngenyanga kepha dokotela wakhe wameluleka kutsi akaye esibhedlela sahlumende Embhuleni. 10 15
- 3 Tintfo tacala kuba timbi esimeni semphilo yaBukhosi, abesativa asehluleka kuphakamisa libhokisi lakhe lemathulusi ngenca yebuhlungu labebuva. Bukhosi wagcina asahleti tinyanga letimbili kuleso sibhedlela. Kuhlala kwakhe esibhedlela bekungasikuhle. Imphatfo yetigulane kubahlengikati ayitekwa, lusizi lodvwa. Leso sikhatsi bodokotela bebaloku balwa nekucwaninga kutsi ngabe unasifo sini. Imiphumela yaveta kutsi unesifo semdlavuta wematsambo. Ngaleso sizatfu Temave watsatsa sincumo sekuyewusita Bukhosi, wachuba tifundvo takhe ngasese. Phela kubalulekile kutsi unakekele ubuye wesekele loyo lomtsandzako. 20 25
- 4 Temave yena wasala walichuba kahle libhizinisi, elekelelwa tisebenti tabo ngalesikhatsi Bukhosi asesibhedlela. Konkhe abekwenta kahle nemali ingena ngalo lelibhizinisi. Ewadini labelele kulo kunesigameko lesatsintsa inhltiyo yaBukhosi. Lesinye sigulane besidzinga nje kutsi bahlengikati basinike emanti ekunatsa ngenca yesimo lesibucayi lesasikuso kepha bekufana nekutsela emanti emhlane welidada ngobe abamange basinake. Wasisita lesigulane ngobe yena abekhona kutihambela. **Asizange siwuvale umlomo, bekwehla tinyembeti sibonga singacedzi**. Bukhosi wenta sifungo sekutsi uma Mvelinchanti angamgcina iminyaka nje lelishumi kulesifo lesimphetse ufuna kwenta umehluko etimphilweni tebantfu labagulako. 30 35

- 5 Ngenca yaloluhlobo lwesifo labenaso kwadzingeka kutsi edluliselwe esibhedlela lesisePitoli lesibitwa ngekutsi i-Steve Biko. Nakhona kwatsiwa lusito utalutfolela esibhedlela sahlumende eKapa. Intfo leyaba matima kutfolela luhlobo lwemnkantja wematsambo lofana newakhe. Kwentiwa lucwaningo kubelusendvo kucala ngembikwekutsi lufunwe ngaphandle. Ngelishwa, dzadzewabo abefanana naye ngemaphesenti la-50 kuphela. Kulapho wabonisana naTemave kutsi kuhle bacale inhlango yekufunela bantfu labanalesifo lesifana nesakhe umnkantja. Yacala kanjalo - ke leyo nhlangano lengenti inzuzo labayibita ngekutsi 'Litsemba lemphilo'. 40 45
- 6 Bukhosi bekufanele ayocala kwelashwa esibhedlela lesisekudzeni saseKapa. Benta sincumo sekuvala libhizinisi labo. Nembala batsengisa konkhe belekelelwa bangani neminden yabo. Kufika kwabo eGroote Schuur kwadzingeka bente luhlolongati lwekugcina kute atewucala tindhlelo tekwelashwa. Dokotela watsi angaphila iminyaka lelishumi kuya kulengetulu uma bangalandzela kahle konkhe labatawutjelwa kona kuletinhllelo. Enhlityweni yakhe wefikelwa kuthula lokumangalisako ngobe emthandazweni wakhe abecele emalanga ekuphila lalingana nalawo lashiwo ngudokotela. 50 55
- 7 Lwacala-ke luhlelo lwekumelapha, lwatsatsa iminyaka lemibili. Loluhlelo lwadzinga kutsi bente taba tekucala umsebenti lotawubangenisela imali leyanele tidzingo tabo. Temave weta nelisu lekucala libhizinisi lelisha nekufuna indzawo yekuhlala ngobe nemali labayitfolela uma batsengisa lelibhizinisi labo yase icala kuncipha. Batitsengela iloli lendzala lebayigucula yaba likhaya labo labatawuhlala kulo, ngaphandle kwekubhadala. Baticalela libhizinisi lelingeke lidzinge imali lenyenti uma lisungulwa. Bebatfunga tikhwama ngemaplastiki, imigeco, bapenda titja naletinye tintfo tekuhlobisa indlu. Imikhicito yabo bebayitsengisa etimakethe futsi itsengwa kakhulu. Ligama lelibhizinisi labo balibita nge-'Buciko Betandla.' Lakhula kahle kakhulu. 60 65
- 8 Letitsandzani tabuyela emuva esigodzini saKamantjolo emuva kweminyaka lemibili, aphile saka Bukhosi. Lokuhle, Temave abesatitfolile ticu takhe te-LLB labetifundzela. Balibona likusasa labo kutsi litawuchakata, kute lokutawuma endleleni yabo ngemuva kwalobumatima labedule kubo. Konkhe- nje kwaba liphupho kubo. Imphilo yabo yabuyela esimeni lesihle ngalokwedulele. 70

[Itsetfwe: *Get it*; April 2023]

1.1.1 Khetsa YINYE imphendvulo kuletilandzelako:

Nguyiphi inkhulumo lengafanela lamagama lacindzetelwe endzimeni yekucala?

- A Kutsandzana kakhulu.
- B Kutsandzana kahle.
- C Kutsandzana kancane.
- D Kutsandzana kamnandzi.

(1)

- 1.1.2 Ngusiphi sikhungo saHulumende lesavakashelwa nguBukhosi ngalesikhatsi angativa kahle emtimbeni? (1)
- 1.1.3 Kubaluleke ngani kutsi kwentiwe lucwaningo lwengati uma sigulane sifika esibhedlela? (1)
- 1.1.4 Belitawumsita ngani Bukhosi likhadi lekuya kadokotela lelikhokhelwa njalo ngenyanga? (1)
- 1.1.5 Nika tizatfu LETIMBILI letabangela kutsi Temave acedzele tifundvo takhe ngasese. (2)
- 1.1.6 Ucabanga kutsi yini lebangela tigulane tingatfoli kunakekelwa kahle kuletinye tibhedlela? (2)
- 1.1.7 Chaza lenkhulumo lebhalwe yacindzetelwa endzimeni ye-4 kuletheksthi lengenhla. (2)
- 1.1.8 Ngekwakho kubona lesincumo lesatsatfwa nguletitsandzani sekutsengisa lelibhizinisi lato lekucala saba sihle yini? Sekela imphendvulo yakho. (2)
- 1.1.9 Sento sekutfunyelwa kwaBukhosi esibhedlela sasePitoli, sivetani ngesimo sesibhedlela saseMbhuleni? Chaza. (2)
- 1.1.10 Ngemuva kwekufundza letheksthi ungabeluleka utsini bantfu ngesifo semdlavuta? (2)
- 1.1.11 Uyavumelana yini nekutsi Bukhosi ungumuntfu lonesibindzi? Sekela imphendvulo yakho. (2)
- 1.1.12 Tifundvo tini lotitfoli ngemphilo yaTemave? Nika TIMBILI. (2)

1.2 Fundza lesibonwa bese uphendvula imibuto lelandzelako.

ITHEKSTHI B


IFREYIMI-1



IFREYIMI-2



IFREYIMI-3



[Itsetfwe: <http://www.alamyimages.com>]

- 1.2.1 Nika KUNYE lokungumkhicito walokwenteka eFREYIMINI YE-1. (1)
- 1.2.2 Ngubuphi bungoti lobungahle buphatamise banikati balelibhizinisi lelivetwe eFREYIMINI YE- 2? Nika BUNYE. (1)
- 1.2.3 Indzawo lefana nalelevetwe eFREYIMINI YE-2 iwusita njani ummango? Bhala KUBILI. (2)

- 1.2.4 Ngusiphi sizatfu lesisenta sitsi lesigulane leliseFREYIMINI YE-3 siphatseke kahle? Chaza. (2)
- 1.2.5 Lesigulane lokukhulunywa ngaso kutheksthi-A endzimeni yesine, sehluke ngani kulesigulane lesivetwe eFREYIMINI ye-3 kutheksthi B? (2)
- 1.2.6 Bhala budlelwano lobusemkhatsini wenzima yesikhombisa kutheksthi A neFREYIMI ye-2 kutheksthi-B. (2)

SAMBA SESIGABA A: 30

SIGABA B: SIFINYETO**UMBUTO 2**

Fundza lethekesthi bese uyayifinyeta ngewakho emagama la-80. Sifinyeto sakho **asivete emaphuzu lasikhombisa etintfo lokumele bantfu bangatenti kute kuvikelwe imvelo.**

CAPHELA

1. Sifinyeto sakho asibe ngendlela yetindzima (emapharagrafu).
2. Akukadzingeki kutsi ubhale sihloko.
3. Khombisa linani lemagama lowasebentisile ekugcineni kwesifinyeto sakho. (Linani lemagama alibe setibiyelweni.)

ITHEKSTHI C**IMVELO**

Tinyenti tintfo letentiwa bantfu letihlukumeta imvelo. Imvelo kushiwo emanti nalokuphila kuwo, tihlahla, tjani, umoya, tilwane letiphila eveni kanye nebantfu. Imvelo isipho lesivela kuMdali lekufanele sisihloniphe, sisinakelele.

Tinkhomo nguletinye tilwane letiyimvelo letibukene nebumatima bekulahlwa kwemaplastiki etigangeni. Phela inkhomo uma idle liplastiki itfolo bumatima ngobe aligayeki esiswini. Loko kubanga tifo ngenca yemakhemikhali latfolakala kulamaplastiki. Uma bantfu bayewutsenga esitolo, abangasebentisi tikhwama letentiwe ngemaplastiki kepha abasebentise letentiwe ngemaphepha.

Letinye tilwane tihlukumeteka kakhulu ngenyanga yeNgongoni. Emakati netinja kugcwala tiganga ngobe emakhaya akuhlaleki. Loko kukhomba kutsi bantfu labanyenti abayitsandzi futsi abayicabangeli imvelo. Bantfu abangashisi emakhilikhethi uma kujutjwa umnyaka.

Akugcini ngetilwane kuhlukumeteka. Imifula nelwandle kuyincenye yemvelo letsintsekako. Umfula uyindzawo yetilwane letehlukene futsi nebantfu batfolo kuwo emanti. Kubalulekile kutsi kungalahlwa tibi emifuleni naselwandle ngobe yonkhe imvelo idzinga emanti lahlobile. Kulahla tibi kusho kuhlukumeteka kwawo. Lwandle nalo luyahlukumeteka ngobe kukhona tilwane letihlala khona njengetinhlangi naletinye. Bantfu nabo bayawadzinga emanti lahlanekile ngako-ke kubalulekile kukhombisa inhlonipho nekutsandza imvelo. Lokunye lokubalulekile kungacitsi i-oyili elwandle ngobe kubulala tilwane. Titfutsi letifana nemikhumbi ngito letenta umonakalo lomkhulu.

Tihlahla nato tiyincenye yemvelo lebalulekile kubantfu netilwane ngobe umoya lokhishwa ngito uyimphilo. Bantfu kumele bafundziswe ngekubaluleka kwetihlahla nekuvikelwa kwato. Akungajutjwa tihlahla kute titewukhona kukhica umoya lohlantekile lodzingwa bantfu netilwane. Umuntfu ngete wamkhona, umtfolo acashe neloli yekulayisha leto tihlahla lesetentiwe tinkhuni letiyewubaswa emakhaya.

Lokunye lokuhlukumeta imvelo kwandza kwelinani letimoto lapha eveni. Ufola umuntfu nemuntfu ashayela yakhe kantsi kuyiwa ndzawonye.

Uma bantfu baya endzaweni yinye abangasebentisi timoto letehlukene kepha bangasebentisa yinye nabaya ndzawonye nobe tiffutsi temmango.

Kunemkhankaso losungulwe ngulabanye bosomabhizinisi kutsi tintfo letingasebentiseka kabusha njengemabhodlela tikotela emaplastiki netinsimbi atingalahlwa. Buhle baleyondlela kutsi lomkhicito uvamise kutsengiswa ngelinani leliphasi. Umuntfu akatibute umbuto ube munye kutsi yini langayenta kugcina imvelo isesimeni lesikahle.

[Lhunyushwe itsetfwe ku-Infinitylearn.com]

SAMBA SESIGABA B: 10

SIGABA C: TAKHI NETIMISO TEKUSETJENTISWA KWELULWIMI**UMBUTO 3**

Fundza lesikhangisi bese uphendvula imibuto lelandzelako.

ITHEKSTHI D

VUM'INGOMA SIKOLO SEBACULI

COSHA LIKATI ETIKO NGEKUBA NGUMCULI WELIKHETSELO!



- 1 Ngabe uyakwati kukhuluma kodvwa awukwati kucula, uyaklabalata?
- 2 Wota kaVum' Ingoma utawuntjilota ube yinyoni.
- 3 **Locedze kuceceshwa uhamba netinsita takhona mahhala!**
- 4 Lesikolo setfu sikhapha **emagagu** emculo.
- 5 Labafundze kitsi balandzelwa tinkhulungwane tebatsandzi bemculo emhlabeni wonkhe.

*Uma ufuna kutfola ngetindleko naleminye imininingwane shayela kule nombolo yelucingo
067 123 00010, 013 743 2123 nobe ubhalele kule-imeyili yetfu: vum'ingo@umculo.co.za*

[Itsetfwe: <http://www.alamycartoons.com>]

- 3.1 Khokha emagama kulesicubulo langadvonsa bantfu labangasebenti bete ngebunyenti batewufundza kulesikolo. (1)
- 3.2 Bhala YINYE yetindlela tekuchumana lengakabhalwa kulesikhangisi labangayisebentisa labo labafuna kufundza kulesikolo. (1)
- 3.3 Khetsa YINYE imphendvulo. Lenkhulumo lelandzelako letsetfwe kuletheksthi iluhobo luni?
- Labafundze kitsi balandzelwa tinkhulungwane tebatsandzi bemculo emhlabeni wonkhe:
- A Inkhulumo lehungako.
B Inkhulumo leyinkholelo.
C Inkhulumo leyimfundzisolite.
D Inkhulumo letsatsa luhlangotsi. (1)
- 3.4 Kubangelwa yini kutsi lenkhulumo lecindzetelwe kulesikhangisi kunombolo ye-3 kutsiwe iyahhunga? (1)
- 3.5 Kubangelwa yini kutsi lapha kuletheksthi kuvetwe labancane bajayiva bese laba labadzala bavetwe bahlabelela? Chaza. (2)
- 3.6 Ngekwakho kubona ngusiphi sizatfu lesenta kutsi bangativeti tindleko tekufundzela umculo kulesikolo? (2)
- 3.7 Tsatsa ligama lelicindzetelwe lelikunombolo ye-4 kulesikhangisi ulisebentise emshweni lotakhele wona libe ngumcondvophika. (2)
- [10]**

UMBUTO 4

Fundza lekhathuni bese uphendvula imibuto lelandzelako.

ITHESKTHI E

[Itsetfwe: <https://images.search.yahoo.com/>]

4.1 Khetsa YINYE imphendvulo lenembako lesho luhlobo lwelibito lelicindzetelwe leliseFREYIMINI ye-1:

- A Libitongco
- B Libitogcogca
- C Libitomuntfu
- D Libitosimo

(1)

- 4.2 Khokha umusho lonesentakutsi eFREYIMINI ye-1 uwubhale phasi. (1)
- 4.3 Ngukuphi lokukhomba kutsi labantfu labaseFREYIMINI ye-2 bamangele? Nika KUBILI. (2)
- 4.4 Bhala umusho loseFREYIMINI ye-2. Iyinkhulumo lekombisa emandla ekuphatsa. Usho ngani? (2)
- 4.5 Uyavumelana yini nekutsi lekhatuni ayivuni bulili? Chaza. (2)
- 4.6 Lenkhulumo lecindzetelwe leseFREYIMINI ye-3 itsatfwa njengemaciniso ibe itsintsa imiva yalabanye. Sekela lesitatimende. (2)
- [10]**

UMBUTO 5

Fundza lethekesthi bese uphendvula imibuto lelandzelako.

ITHEKSTHI F**INHLUPHEKO**

Bumatima bekufika ekhaya kungenamanti netinkhuni kuholela ekutseni umuntfu acabange kuvula libhizinisi lekucatulula letinkinga letikhona endzaweni laphila kuyo. Phela inhlupheko isuke ibhalwe ebusweni ngobe umuntfu kumele avuke ekuseni ngembulukusa ayewutfota abuye atfwele inyandza yetinkhuni. Uma aphuma esikolweni kumele achube **libhala** ayewukha emanti lapho masipala awatsela khona emathangeni. Loku kuba yinsakavukela umchilo wesidvwaba. Kujabula bosotimali labakhona kutitsengela kulamaloli latsengisa emanti. 5

Labanye bantfu bakubona kuyinhlekisa kuchuba libhala ukhuphuke intsabakati kepha hhayi kuMfanufikile, lowagcugcuteleka ngaloku lakubona kwenteka endzaweni yangakubo. Loko kwamenta kutsi atsatse umkhakha wekufundzela Temanti enyuvesi atewukhona kusombulula tinkinga tawo. Phela kuyintfo lemmandzi kutsi uma ufundza ubuke lokutidzingo emmangweni bese ufundzela loko lokutawutfufukisa. Lamuhla Mfanufikile uphetse inkampani lenkhulu lesebenta ngekudvonsa emanti ngaphasi kwemhlaba. Watsenga umshini lomkhulu wekudvonsa emanti ngaphasi kwemhlaba bese uphakela ummango. Lamanti abenikela ngawo etindzaweni letifana netikolo kanye nemimmango lewadzingako. Kufundza kwakhe kuwusitile umndeni wakubo lomkhulise matima kungenababe. Sikhuluma nje ummango wangakubo uhleka **kuvele lemhlatsi** ngobe inkinga yemanti sekwaba liphupho layitolo. 10 15

[Itsetfwe: *Ilanga*, April 2022]

- 5.1 Endzimeni yekucala kulethekesthi lengenhla kunemusho loneligama lelisha, wukhokhe. (1)
- 5.2 Lencenye yeligama lecindzetelwe emgceni wekucala wendzima yesibili iveta muphi umcondvo? (1)
- 5.3 Tsatsa ligama lelucindzetelwe endzimeni yekucala wakhe ngalo umusho kuvele umcondvo lowehlukile kunalowo lokulethekesthi lengenhla. (2)
- 5.4 Calisa lomusho lolandzelako ngekutsi, Kuleliviki lelitako ...
Lamuhla Mfanufikile uphetse inkampani lenkhulu lesebenta ngekudvonsa emanti ngaphasi kwemhlaba. (2)
- 5.5 Kulomusho lolandzelako tsatsa ligama lelitsi 'lemmandzi' ulisebentise emshweni lotakhele wona.
Phela kuyintfo lemmandzi kutsi uma ufundza ubuke lokutidzingo emmangweni bese ufundzela loko lokutawutfufukisa. (2)
- 5.6 Sebentisa ngalokwetayelekile lesisho lesicindzetelwe endzimeni yekugcina emshweni lotakhele wona. (2)
- [10]**

SAMBA SESIGABA C: 30
SAMBA SAKO KONKHE: 70